

ЛҰИМА СЭРИПОС

9 апреля
2020 года
№7
(1217)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Ты хурит Хальүс район Саранпавылт өлнэ нэ
Нина Николаевна Загайнова пöслым öлы.
Ты мәщтыр нэ урыл нан 6-7 лөпсыгт потыр ловиньтэн.

Ты
номерт
ЛОВИНЬТЭН:

Няврамың
щёмьят
олнаныл
нөх-нётвёсыт

2

Нэпак
тэратан
пора
ёхты

3

Вөрт
алыщлаңкве
такви
вөрми

6-7

Мәньщи
эргыт
эргуңкве
сака
хасёг

10

Ты нэ
öвыл
места вис

16

Няврамың щёмыят олнаныл нōх-нётвёсыт

Маньполь этпос 26 хōталёт Округ Думат рўпитан депутатит акван-атхатыгласыт. Тāн 26 сākконыт ос постановление-нэпакыт пирмайтасыт. Сапрāнин Государственный Думат рўпитан мāньщи нэ Татьяна Гоголева ѓс ёхталас.

Ѓвлёт депутат-хōтпат округув янытыл ѓлнэ 31 элумхōлас янытлан мāгсыл нэпак пирмайтасыт. Тāн Почётный грамотал манос мōт янытлан нэпакыт ань тах мивет.

Ты юи-пāлт тāн округ бюджет урыл потыртасыт. Нэпак хўрум 2020, 2021 ос 2022 тāлытн хасвес. Округ Дума кўчай хум Борис Хохряков лāвыс, депутат-хōтпат акв тāл сыс нила щёс тув йильпи лāтың хансуңкве вёрмёгыт. 2020 тāл ань сāvнув олныл хасвес, ты пора сыс 272 млрд солкōви тах холтаве.

Тāл котиль этпост Россия Президентув Владимир Путин мāхумн лāтың кётыс. Тав сāv ёрнэ рўпата вāруңкве лāвыс, мāнь няврамыт олн ойтнэ тāл шкитат вост тыттавет, āгит-пыгыт хансунжван хōтпат сэлнэ олнаныл нōх вос нётавет, мāнь няврамыт ёт юн ѓлнэ нэкет сāvнув пособие-олныл вос ойтает ос сāv мōт ёрнэ вāрмалит урыл тōнт тав потыртас. Мāн округувт ты рўпата вāрнэ мāгсыл округ бюджетныл 5,4 млрд солкōви ань холтаве.

Кол ўнттын вāрмалит ѓс сāvнув олныл хасвёсыт. Ань пёс коланылт ѓлнэ сāvнув щёмыят йильпи колыл ёвтает. Нефтеюганск, Сургут ос Лангепас ўсытыт хōт

колыт āстлан мāгсыл ѓс олн тāставе. Ты ўсытыт сāv щёмыят ѓлнэ колыт ёвтсыт, тувыл уркуптавёсыт, коланыл ань тыг мус аты āстлавёсыт. Ань округ бюджетныл олныл мивет.

Мāнь няврамыт янмалтан щёмыят йильпи пособие-олныл ойтункве ань патает. Нуса тотнэ нёт-хумыт 3-7 тāлыт яныт няврамыт мāгсыл олныл тах ойтает. Сāv няврамыт янмалтан щёмыят пособие-олныл ѓс нōх-нётвёсыт. Савалап няврамыт колыл ёвтнэ мāгсыл сāvнув олн тāставе.

Депутатит ѓс акв ёрнэ сākкон пирмайтасыт. Ань йильпи нэпак щирыл няврам тэлы ащирмаң хōталыт ос йтипāлаг автобуст олн ойтнэ тāл ке мины, тавекон-нявлункве шар ат рōви. Тамле сākкон Россия янытыл ѓлы, ань мāн ѓлнэ мāvт тамле нэпак ѓс пирмайтас.



Иңкўшын мāныл вим хўрийт

Депутат-хōтпат «Югорский семейный капиталыг» лāвнэ олныт ѓс нōх-нётсаныл. Шар ѓвлёт нэпак хунь пирмайтас, щёмыят хўрмит няврамыт мāгсыл яныгсат сōтыра солкōвил ойтвёсыт. Ты юи-пāлт 116 сōтыра солкōви мус нōх-нётвёсыт, 2019 тāл вāt сāграпнал этпос 31 хōталэ мус самын патум няврамыт аквты сāvит олныл ойтает. 2020 тāл пāсныл самын патум няврамыт 150 сōтыра солкōвил миңкве патает.

Пёс йис мāt ѓлнэ сossa щёмыят урыл депутатит ѓс потыртасыт. Тāн округ сākконытн йильпи лāтың хассыт. Ань тот ѓлнэ тōва щёмыят мā-вōй нōх-винэ компаният ёт соглашение-нэпакыт

хансёгыт. Тамле нэпак щирыл тāн «Бураныл», моторыл, хāпыл, хўлпыл ос мōт пормасыл мивет, ос олныл ойтает. Тувыл ты нётмил мāгсыл сossa хōтпат нāлок-олныт тāнки ойтункве лāвавет. Щёмыят салы ўрим, хўл алыщлым, вōраим ѓлэгыт, олн сака ат ѓныщёгыт. Ань ты пирмайтым нэпак щирыл сossa мāхум нāлок-олн воссыг ат ойтэгыт. Тамле ёрнэ лāтың сossa мāхум Ассамблеят рўпитан хōтпат щёпитасыт. Депутатит йильпи лāтың сākконыт хансуңкве кāсашасыт ос пуссын кātпос пинсыт.

Сапрāни ойгпам элы-пāлт округ Дума кўчай хум Борис Хохряков лāвыс, ань мā янытыл мāхум «коронавирус» āгмыл ёмтэгыт, ты тāлт сака сāv элумхолас āтимыг ёмтсыт. Россия янытыл ѓлнэ мир ты пылыщмаң āгмыл ул вос хāхтавет, сāv хōтпат юн рўпитаңкве лāввёсыт. Округ Думат рўпитан депутатит ѓс тох акван-атхатыгланкве ат патэгыт. Тāнки халанылт туп кина суснэ тōтап хосыт ань потыртэгыт.

Людмила ТЕТКИНА

ЛЯХХАЛЫТ

Яңк нәтнэ этпос мус юн үнлән

Округ кўшай Наталья Комарова лавме щирыл, ХМАО – Югра янытыл өлнэ мир ты мат коронавирус агм (тав учёнытн тох намтвес: COVID-19) магыс яңк нәтнэ этпос мус юн вос үнлэгыт, кон сака ул вос ёмөгыт. Ты урыл тав ищхыпың ут хосыт потыртас.

Яныгполь этпос 6 щислатэт кўшай нэв тох лавыс: «Тыхотал ам эрнэ нэпакыт щёпита-сум, ань округ махум пуссын вос вәганыл, юн яңк нәтнэ этпос мус үнлантаңкве эри. Ты этпост туп тәнүт ләпкат ос аптекат рүпитаңкве патэгыт. Округувянытыл ты коронавирус агмыл 16 хөтпа хәхтүвёсыт, тамле нак анализаныл хосыт тәра-паттүвес. Ань 17 хөтпа анализа-ныл лёккарытн ўравет, агм нупыл хартэгыт, ос торыңыщ тәра-пат-түңкве ат вёрмавет, кёл-паныл китынтыг вуй-

вёсыт. Тән халанылт акв нйврам. Хөтхуйплов хөтпа Сургут ўст өлэгыт, акваныл Нягань ўст ўрхаты».

Тувыл мөтыт хөтал, яныгполь этпос 7 щислатэт, мөт ляххал ёхтыс, ань округувт 38 хөтпа тамле пылыщмаң агмыл агмыңыг ёмтсыт. Кит хөтпа пусмалтахтасыг, пўльницаныл юв тәрт-вёсыг. УРФо янытыл Свердловский областьт 44 хөтпа агманыл тәра-паттүвёсыт, Ямал мāt 30 хөтпа, Тюменский областьт кит хөтпа.

Наталья Комарова лёккарыт нупыл лавыс,



махум пусмалтан магыс эрнэ матыр пуссын вос щёпитэгыт. Матыр атим те, вос лавөгыт, аквта тәра ёвтаве. Округт рү-питан Роспотребнадзор кол кўшай вәңын хөт-патэ Инна Кудрявцева лавыс, ань пўльницатыт эрнэ тәрпит ос савсыр машинат өлэгыт, ты коныпал тув сав хөтпа тотаве те, касың хөтпа магыс пёрина хөнтэгыт.

Промышленность департамент кол кўшай

хум Кирилл Зайцев лавме щирыл, ань төр маскат юнтың магыс 100 сөтыра метра марля ос кат ловтнэ магыс 90 сөтыра сульясовыт ёвт-сыт, 1 млн 200 сөтыра савит эрнэ маскат вә-рылтасыт. Ты коныпал тән хөпсы пентсыл рү-питан аппаратыт вә-рылтасыт, мощёртн ок-ругувн тотавет.

**Светлана
РОМБАНДЕЕВА**

Колтаглыт халт касыл вәрыглавес



Округувт «Семья года Югры» намба касыл вәрыглавес. Ты вәрмаль Югра мāt өлупса элаль тотнэ департаментыт рүпитан хөтпат тән щёпитәлсаныл. Тот пуссын аквёет атпан нупыл нёлолов щёмьят кассыт. Ты касылн та хөтпат пёриявет, хотьют мән мāvт лов арыгтем тәл ылы.

Округувт ўсың ос хөт вәрмаль щирыл павлың махум магыс касыл щёпитәлвес. Тән

өлнэ мәнанылт тәнки вәрум рүпатаныл тыг кётыгласаныл. Тыт жюри-хөтпат пуссын рүпатат ёмщакв сус-саныл ос савсыр тәла щирыл нёлоловхуйплов колтагыл пёриясыт.

Щар мак ёмас щёмьят Фирсовыт лаввёсыт, ты колтагыл Белоярский ўст ылы. Оманыл Ирина Кузьминична, хантынэ, тав «Народный мастер России» нам ыныщи. Ты коныпал иң сав мөт щёмья пёриявес. Төва хөтпат наманыл элаль ловиньтән.

«Югра мāt өлнэ мәнлат щёмья»

1 места – Нефтеюганск ўст өлнэ Мякишевыт щёмья. 2 места – Лангепас ўст өлнэ Бродко щёмья. 3 места – Покачи ўсныл Ивановыт щёмья ос Советский район Алябьевский павылныл

өлнэ Уховыт щёмья.

«Сав нйврамың щёмья»
1 места - Пыть-Ях ўсныл Веделевыт-Ямашевыт щёмья. 2 места - Нефтеюганск ўсныл Пантелеевыт щёмья. 3 места – Когалым ўсныл Токаевыт щёмья.

Сосса щёмья щирыл Нижневартовский район Чехломей павылныл Костаревыт колтагыл нөх-патсыт. Ты коныпал ос мөт сав хөтпат нөх-патсыт. Тән ты тәл ыйттур этпост Ханты-Мансийск ўсн ялпың хөтал янытлаңкве вөа-вет. Округувт ты касыл 2004 тәл пасныл кит тәл сыс акв щёс вәрыглаве. Овыл тәл – махум тәнки павланылт, ўсанылт касэгыт, китыт тәл - округ янытыл щёпитә-лаве.

**Ляххал Николай
МЕРОВ хансыстэ**

КҮЩАИТ РҮПАТАНЫЛ

Тән сосса мир магсыл рүпитэгыт

Маньполь этпос 24 хөталэт сосса махум Ассамблеят рүпитан депутаты Ханты-Мансийск үст сапранин акван-атхатыгласыт ос савсыр күщайт тув вöвыгласыт. Төнт тән савсыр сакконьт ос постановление-нэпакыт пирмайтасыт.

Өвлөт олн ловиньтан департаментыт күщай ванын нэ Татьяна Урсу ты тал ос 2021-2022 талыгт магсыл пирмайтым бюджет-нэпак урыл потыртас.

Сосса махум магсыл савнув олн хасвес

Тав лавыс: «Мән округут «Устойчивое развитие коренных малочисленных народов Севера» сосса махум магсыл рүпитан программа савнув олн ань тах таставе. Кит млн 409 сөтыра солкөви сав тал аквэет өлнэ экват-ойкат, яныгпала хөтпат самын патум хөталаныл янытлан магсыл холтавет.

Ты программан тастыглым олныл Нефтеюганский район «Сказка» наппа үщлахтын мат сосса махум маньхапыл касуңкве акван-атхатыгласыт ос «Коренные народы. Нефть. Закон» наппа конференция щөпиталвес. Ань округ

күщажов Наталья Комарова распоряжение-нэпак хансыс, савсыр яныг конференцият, касылыт, суссылтапыт ос мот тэлат 2020 тал сыс вэрыглаңкв ат рөви. Ты вэрмалит нупыл тастыглым олныт пуссын резервный фондын кэтуңкв эри. Сосса махум конференцияныл ос касыл магсыл тастым олныт ювле ат вивет, мот тэланыл нупыл тах холтавет».

Субсидия-олныл элаль нэтавет

Татьяна Петровна кол үнттын вэрмалы урыл ос потыртас. Ань сосса щөмьят кол өвтнэ манос үнттын магсыл субсидия-олныл мивет. 2020 талт ты вэрмалы нупыл округ бюджетныл 360 млн. солкөви тах таставе.

Маньщит, хантыт ос өрн щөмьят ты программан туп 2013 тал мус хасхатуңкве вэрмысыт. Сапрани



Еремей Данилович Айпин китыглахтас, тув ат хансым щөмьят заявление-нэпаканыл хоты порат пирмайтаңкве патавет? Татьяна Петрова лавыс, ты очередин нэмхотыют воссыг ат хансаве. Сосса махум мот программал төнт пирматайтает, хунь ты очередин хасхатам щөмьят пуссын субсидия-олныл мивет. Олн ловиньтан департаментыт рүпитан хөтпат ты нэпакн йильпи латың хасуңкве лавыгласыт, тув хансым щөмьят 50% савит субсидия-олныл ань вос мивет. Ассамблеят рүпитан депутаты тамле латың пирмайтаңкве щар ат кәсашасыт.

Хулюмсүнт школа ты тал үнттуңкве аставе

Татьяна Урсу нэврамыт ханищтахтын колыт үнттын урыл ос потыртас. Тав лавыс: «Округ бюджетн савнув олн хасвес. Хальүс район Хулюмсүнт павылт школа астапан магсыл 176 млн солкөвил таставе. 2020 тал сыс нэврамыт ханищтахтын кол астапаңкве олн тах төвылхаты». Күщай нэ Руслан Проводниковн

ты школа үнттын тэла аквта щирыл элаль уральтым онышүңкве лавыстэ.

Интернатыт өлнэ нэврамыт вос үргалавет

Ханищтап ос маньлат хөтпат вэрмалыныл щирыл рүпитан округ департаментыт күщай хум Алексей Дренин сапранит сосса нэврамыт ханищтан урыл потыртас.

Еремей Айпин таве интернат-колыт урыл китыгласэ. Тав лавыс, Ассамблея депутатын сосса махум ватихал пищма хансыглэгыт. Акв мат нэврамыт люльсаң тыттавет, мот мат оманыл-атяныл эт вәщиныхтуңкве ат тартавет, хурмит мат агмыл өмтум агирищит-пыгрищит юв кэтавет. Алексей Дренин ты урыл лавыс: «Округут 18 интернат-колыт рүпитэгыт. Мән павылквет ос пөс йис мат өлнэ нэврамыт тот ханищтахтэгыт. Ань нәнан хансым пищмат тара манавн кетән, кәсың интернат-колт рүпитан хөтпат өт манки рүпитаңкве тах патэв».

**Людмила
ТЕТКИНА**



ХАНИЩТАП

Савалап нйврамыт яныг үст мүйлысыт



С.П. Собянина

Ювле хультум этпос овылтахтам порат тина суссылтан фестиваль Ханты-Мансийск үст олыс. Нила хотал ты үст савсыр яныг артистат мүйлысыт. Аквта хоталыт порат савалап ос щёмьятн вуим щань-ащ тал хультум нйврамыт тыг ос тотыглавёсыт.

Тан магсыланыл «Созвездие» наппа фестиваль олыс, тан танти халанылт кассыт – хотьютаныл ёмашакв ййкви, эрги манос пёслы. Тан пуссын колтаглың тагыл тыг ёхталасыт.

Та махум халт Восыңтүр павылт олнэ маньши нэ олыс. Тав наме Светлана Павловна Собянина. Ханты-Мансийск үсн тав вим хұрум нйвраманэ ёт ёхталас – Ваня Яптин, Саша ос Света Милковыг. Тананыл опека палыл тав такви щёмьятэн висанэ.

Нэ ань потыртас, Ваня боксын ялантаңкв патыс. Мощ мөлтынув Хальүст касыл олыс, тав тот тит щёс овыл места вуйлас. Руслан Проводниковн сака янытлавес. Мот руш нйврамыг Саша ос Света Серов үсныл олэг,

пыгрищ сатыт классыт ханищтахты, агирищ атыт классыт, тав ос ййквуңкв сака касащи.

Ты тал Хальүс районныл туп тан Ханты-Мансийск үсн тетвёсыт. Молты тал ос Нижневартовск, Урай үсыгн ялсыт. Тот ос акв тамле окружной фестиваль олыс. Тув ялнэ магыс

матыр щёпитаңкв эри, махум элы-палт эргуңкв манос ййквуңкв эри.

Ань ты тал Ханты-Мансийск үсн ты ёхталасыт. «Дух огня» наппа тина суссылтан фестиваль овыл щёс тан ань касаласыт, тананылн тот сака мұстыс. Округ кұчай нэ Наталья Комарова касаламаныл порат сака щагтсыт, аквансыныгтахтасыт, аквёт послахтасыт.

Светлана Павловна ойкатэнтыл Ваня 2008 талт вистэн, тонт пыгрищ ат талэ төвлыс. Нйврам тэнатэн акваг лавсас, тавен юн маршум. Тонт нэ иң тит нйврам Серов үст хонтыс, нэпаканэ атсанэ ос тув та минас. Тэнанэн Восыңтүрн тотсаге, 2014 тал пасныл ань тот та олэг. Ты нйврамыг оматэн Серов үст олы, тав люльсаң олнэтэ паттат нйврамаге хотвуйвесыг, тэн савалап нйврамыт колт ошвесыг.

Светлана Павловна ойкатэнтыл тит пыг оныщег – Алексей ос Николай. Тэн ань сас яныг, вахта щирыл Ямал мат рүпитэг.

Восыңтүр павылт олэг. Алексей тит нйврам оныщи, Марк пыге 3 классыт ханищтахты, Дарина агитэ ты тал овыл классын мины.

Восыңтүрт олнэ щёмьят 34 савалап нйврам танти щёмьанылн висыт. Ос школат пуссын аквёт 63 нйврам ханищтахтэгыт. Савсыр үсытныл вуим нйврамыт тот ат те олнувыт, тонт павыл школа тара лап-пантнуве, сав хотпа рүпата тал хультнувыт. Ты нйврамыт 18 тала-ныл хунь төвлэгыт, тан тара олнэ колыл мивет.

Ваня Яптин урыл Светлана Павловна тох потыртас. Ты маньши пыгрищ Саранпавыл-ныл олы, ляпа рүтанэ пуссын тот олэгыт. Тав яныг колтагылт сатыт нйврамыг олыс, пити-патта пыгрищ. Атяныл Яптин Семен хосат хотталы шалтыс, щаняныл Таратова такви опарищ наме олы. Ань пыг ловит классыт ханищтахты, элалы тав тэнут пайтнэ хотпаг ханищтахтуңкв номсы, Сургут үсн минуңкв таңхи.

Светлана Павловна такви Восыңтүр павлэт сав тал нйврамыт ханищтым школат рүпитас, ань пенсият олы. Школаныл хунь пөхан минас, нелолов тал культура колт рүпитас. Ань ты хұрум савалап нйврам уральтым ос янмалтым юн олы. Тан пустагыл пуссын вос олэгыт, нйврамаквет ёмас хотпаг вос яныг-мэгыт.

**Валентина
ВАСИЛЬЕВА**



Ворт алышцлаңкве такви вёрми

Молал Ягрим павылы ялмум порат Нина Николаевна Загайнова ёт потыртасум, таве ам хосат тагыл ваглум ос олупсатэ урыл мощ титыгласум. Нина Николаевна Щёрти ойкатэ ёт ворт алышцлан ма оныщег, та урыл мён потрумён олыс.

Нэ лавыс:

– Яныг Сорахта хосыт алышцлан мав ос вёр-колув олы, тув мус туй я хосыт 190 вёрыста минуңкве эри, тэлы порат мощ ляпанув, 62 вёрыста тэлы лёңх хосыт. Ам мам Тамара Савельевна Ванюта (Вьюткина) «Месыг» намба общинатэ нупыл ловиньтахты, тувле нупыл ляпагнув олы. Тавёныл ты лицензия-нэпак выгум, янгуи катын-паттын магсыл тамле нэпак эри. Тёрня-лыт ос мот эрнут ос тав таратёныл ман ёвтэв.

– **Нина Николаевна, наң наңти писалъ оныщегын, писалил пәтлуптэгын?**

– Ам пәтлуптэгум, амти писалыанум маг-сыл эрнэ нэпакыт пус-сын оныщегум. Амти писалиң тагыл ёсал ёмыгтэгум, ты кастыл матыр-ати пуссын оныщегум. Тўяг ос таквсы вас пәтлуптэв, ам амти тёрнялит оныщегум, пыгагум ос ойкам касың танти тёрнялит ўнттэгыт, тох ворт алышцлэв.

Алышцлан мавт тит вёркол оныщев, акватэ пёсыг ёмтыс, хотатем тал ювле хультум порат йильпи кол ўнттысўв, пувлынкол, ампар оныщев. Ман алышцлан мав ёлын кос олы, манавыл алгаль иң акв алышцлан хум



П. Сетова ос Н.Н. Загайнова

матэ олы, ос ты накт мот махум ёхталаңкве патсыт, сартын махум васаныл, ты ман мав, тув нэмхотыют сака ат ялантас, ань тай тохи ам алышцлан манум хосыт лёх вәрнэныл. Вёрколувныл алгаль ос колыт ўнттуңкве пат-сыт. Ам тай номтум щар ат кос паты.

Тёрнялянуи ўнлын

тара снегоходыл яла-сэгыт, эрың хотты ўй-хул тув патыглас, тан хот-алмаияныл. Ам уральтаңкве ёхтэгум, тёрнялянуи татылат, нэматарын ат патымат.

Таквсы тўйт вовта порат найив атэв, тэлы кастыл палтыглахтуң-кве тасыг вос олыс.

– **Нан вёрколын палыг-хультуптылын манос туманыл лап-пантилын?**

– Сартын тай тох хультупталыслўв, лап ат туманталыслўв, тувыл савсыр утыт яласэгыт, товат тўлмантэгыт, тай-магыс ань йильпи колув, сараянуи лап-туманты-януи, туп пёс вёрколуи тох хультуптылўв.

Та колуи кўр оныщи, найив, щеранка хуль-туптэв, щайпут, саккар, солвал, сукари ос матыр тэнут, ёхтын хотпа вос толтыглахты, хотыют эрың эт хўлы. Тан туп ул вос тўлмантэгыт, пёс порат вёрколыт туман-ыл лап ат пантигла-вёсыт, нэмхотыют лўль ат вэрыглас, ань тох ати, мот хотпан агтуңкве ат хойхаты.



Н.Н. Загайнова ййкви



Н.Н. Загайнова пыге агиришкве ёт

ҮЙХУЛ АЛЫЩЛАН ВАРМАЛЬ



Потыр хунтлым үнлэгыт



Нэквет юнхатэгыт

– **Нина Николаевна, наң туи ос тэлы мана-рыл тув ялантэгын? Манхурип хәп ос мотор оныщэгын?**

– Тэлы мән снегоходыл яласэв. Туи кастыл мән йивхәп оныщэв, тав саранхәпыг ләваве. Тәрхәпыл тув минуңке нәмхотмус. Овлэт мән Сакв я хосыт минэв, Мувынтесыл лонхальнүв Мән Сорахтан шалтэв, та я сака шакаралы, вататэт йивыт патыглым олэгыт, төва мат ворил ты минэв, Мән Сорахта тувыл Яныг Сорахтан паты, та я тай пәхвыңнүве. Яныг Сорахта хосыт ос алгалы моторыл минэв.

Молты ам йильпи мотор ёвтсум, 9,9 сәвитэр оныщи. Эрнэ нәпаканум атсум, Хәльусн тәтсанум, тахсум, субсидия-олныл

ювле вос ойтавем. Ты кастыл насати тәрхәп эри, ос та хәпум магсыл ГИМСыт нәпакыт вәруңке эри. Сәккон щирыл тытем мән мотор тамле нәпакыл рөви ат вәруңке, ос тамле нәпакыт тәл субсидия-олныл ат мивем. Тәрхәп анумен ос ат эри, тамле хәпыл мән ойкамәнтыл тув мус ат ёхтымән. Тох аны тыг мус олныл ювле ойтунке ат вәрмавем, эрың сәккон мотнүв щирыл те хансаве, тонт нәпаканум пирмайтавет.

– **Вөрт, нән олнэ мән, телефон связь олы?**

– Ати, тот сотовый связь ат рүпиты, ам спутниковый телефон ёвтсум, тапалыт мат эрың хунт потыртаңке эрмыглы. Телефонум атпан нупыл ат

сөтыра солкөви тынэ, тав магсылэ тай субсидия-олн матахсәвит ювле ойтаве.

– **Ты телефон хосыт потыртаңке мансәвит тынэ?**

– Ам акв күм магыс акв доллар ойтэгум, таи ёмас, хунь ат потыртэв, олнанув тох олэгыт, нәмхотталь ат вивет. Ваглум, мансәвит ойтсум, тасәвит тот олы.

– **Нина Николаевна, наң коныпалн увщиянын нәмхотьютананын вөрн алыщлаңке ат ялантэгыт?**

– Ати, ты ам тох олунке кәсәщегум. Ойкам рущ кос, ос Сорахтамән сака эруптытэ, тув тәнүтың тагыл минымән, тот туюхлымән, таквсылтымән. Щар мәнщи холыт вөрт матыр-ати вәруңке хәсы. Мән пил ватымән, ләхс атымән, ам пил пәйтэгум, сәвсыр пәнкат вәрэгум. Вөрт олунке сака ёмас.

Нина Николаевна увщиянэ Саранпавылт щәмьяныл ёт олэгыт, каңке Василий Николаевич Вьюткин экватәнтыл Сүкырьят олэг.

Нина тит аги ос тит пыг оныщи, мән агитэ иң школат ханищтахты. Нявраманэ няврамыт тав палтэ тотыглавет,

тәнаныл үрим юн үнлахолы, ты коныпал юнхатунке алыми.

Туи «Мән Ыскве» няврамыт үщлахтын мән яланты, тот нэ хөтпат ос агит сәсныл сәныт, мән апат юнтуңке ханищтыянэ, аквёт тучаңыт, аканит, юнтуп туштын нәмтат, хурыг-совыт нуйныл юнтэгыт. Туяг няврамыт ёт вөрн сәс нуоңке ялэгыт, тав суссылтыянэ, хоты сәс манарыг вәруңке рөви, хоты сәс нуоңке эри. Я ватат ошца лямийвыт сунсыглэгыт, тәнаныл мән апа юнтнэ магыс яктыяныл.

Туи няврамыт ханищтаме порат татем нётнэ сән юнтум, тивре хансал щуртме, тамле ты кәркам ос мащтыр мәнщи нәкве Саранпавылт олы. Тав нупылэ сунсым няврамыт ос мот нэквет татем симыңыщ мәнщи пормасыт вәруңке вуйхатэгыт, акв пөхын үнтылматэгыт, Нинан хултыглавет, хоты лөмт ман янытаг йинуңке эри.

Ятил мәнщи нәкве щәмьятэ ёт ос рүтанэ ёт пустагыл вос олэгыт, воряян сөт вос оныщэгыт, Нәй-Отыранувн вос үргалавет!

**Галина
КОНДИНА**



В. Уэль вәрум хури

В.Н. Герасимова (увщитэ) ос Н.Н. Загайнова

Сәт Өтыр үнлүм мәт яныгмам Эква

Ты тәл мәнь таквс этпос вәт нупыл хөтыт хөталәт Дина Тимофеевна Лисова яныг намхөталә ёмты, тав 80 тәлз тах төвлы. Тав сәв тәл Хәльүст җлы. Та ювле хульгум тәл оигпам элы-пәлт мән тав ётә Ёст акван-хөнтхатыгласмән, потрамасмән. Яныгпәла хөтпа потре ань элалъ ловиньтәлбн.

Щәмьятэ урыл

– Ам Посалтыт пә-вылт 1940 тәлт самын патсум. Ты пәвыл Потрасүй пәвылныл алгальнүв үнлыс. Яныг пәвыл җлыс, ләпка, пувлынкол, сәв колыт тот җлвёсыт. Тот Садоминыт, Куриковыт, Мелентьевыт, Остеровыт, Албиныт җлсыт. Гындыбин Павел Павлович җлыс, тав хөнтлын мән тотыглавес.

Увщим җлмёт пәвлүв урыл тох ләвыглас, та мә Сәт Өтыр, Сәт пупыг үнлүм мәг җлы. Таимәгыс колыт пуссын яныг пупгың колыг җлсыт, тән урам тармыл үнлысыт.

Хунь пәвыл витн амарава, мәхум коланыл халт хәпыл яласэгыт. Ос коланыл төсам мәт үнлэгыт. Ам тай номтум патыс, хунь колыт хотлөсталавёсыт ос Потрасуйн тотвёсыт. Төнт ты номтут ушты тәкыг ёмтыс. Коланыл үнлүм ёрыт вөңхаг хультсыт. Хунь түйт толүңкв паты, мис мәгыс вит акваг тот та амартэгын.

Тувыл колхозыт акван-тотуңкв патвёсыт. Та порат Ульяна увщим әгмыл ёмтыс. Алпитэ щар выгыр, корь намба әгм нәглыс. Омам совыр сов тармыл таве җныщистә. Алпитэт сов нюлмиянә хот-хусматэгыт, тавән әгмыңыг үл вос җлыс, тамле утыл



җныщистә. Посалтыт пә-вылт руш Эква җлыс кос, ос ләккар та порат тот әтим җлыс.

Акв Эква омамн ләвум: «Наң выгыр пилыл таве тыттәлн. Әгме төнт кональ тах мины». Тыттыстә. Тувыл түйг увщим ёмаснүвег ёмтыс, кон квәлы. Кон квәлы, колыт щар әтимыт. Пуссын то-тымат. Тав хосытэтыл мән колув Посалтыт пә-вылт та хультыс. Тәлы пәвыл колув тай хотлөсталавес, Потрасуйн тотвес. Ань тыг мус колъёре тот ты җлы.

Посалтытт ос мәньнүв колув тыт хультыс.

Увщим юрт әгирищанә Куриковыт, тувыл ос мөт юрт әгирищанә тән пуссын ты әгмыл хотталъ щалтмыт. Тав тактётә та хультыс. Ул Төрүм ләвум щирыл хотмус нөх-воратас. Тав 1982 тәл мус җлыс, тасәвит ныврам җныщис.

– **Наң әтян урыл моц потыртән.**

– Ам әтям Тимофей Константинович Остеров, Посалтыт пәвылт яныгмас. Тав хөнтлын мәт хөт порсыс. Тав Эстоният тот хөт хотталъ тыпыс, Ленинград үс вуянтым җс хөнтлыс. Тувыл трудовой лагерьт җлыс. Тав хөнтын тәра вуйвес, сака ёмашакв пәтлүптас, снайперыг җлыс.

Омав мән ётув тактёт та хультыс. Мисанә ёт пәвлүвт таквсы мус тот җлы. Пум вәри, хул пуйи, вөрүй, антәтрыт алыщлы, щёпрыт нәлил алыщлы, акваг вөраим яласас. Тәлыиг ёмты, мисанә ёт Потрасүйн мины. Түйг ёмты, җста тыг вәнтлы. Ты колә таимәгыс тот та хультыс. Ул самсайн нас тох тыт та хульгуптавес.

Тувыл сәвсыр хаштәл





Ойкатэ ос агитэ ёт



мир, комсомольский, партийный ойкат тав колэ тара акваг та щивгёгыт. Мансавит найив тавён сáгрунkv эрыс. Туп акв кол ўнлы, таит ащирмат ёхтёгыт, юв шалтёгыт. Лавёгыт: «Аквёква, кўрын пáлтэлн». Щáйпут ўнтты. Тащир та олыс. Омам о́лмёт ма́ньщи щáй ма́гыс сáвсыр лўптат аты, тóслыанэ. Рушанэ тай плиточный щáйл айты-янэ. Лáви, ты тай руш щáй тáн вос аияныл.

Омам пáтлупта́нкв о́с сака хáсыс, лэ́нын пáтлуптас. Люли́н ховтыт лэ́нын те ўнлы, тав шар самы́н пáтамтытэ. Омам о́лмёт пенсия аты вуйлас, тох пенсия тáл та олыс. Тыкос государство ма́гыс сáв онтас вáрыс. Тэлы лэ́нын алы, таквсы антáтыр алы, та сованэ мыг. Совыт ёмасыг вос о́лсыт, ёмáщакв пáтлуптыанэ. Сованэ ма́гыс туп мощ о́лн-лóмтыл майлувес. Та хосытыл ам та о́лсум. Институтн мина-сум. Омам о́лнанэ мыг, увщия́нум нётсыт. Та атум о́лныт хосытыл ам Ленинград ўсн ялэгум. Юв ёхтэгум, мисанум ма́гыс пум вáрэгум, найив сáгрэгум, омам тынутыл щёпиту́лум. Тувыл хани́щтахту́нкве о́ста минэгум. Тащир Улья́нам ос ам я́тил омамён та ўргаласлуме́н.

– **Оман наме хумус о́лыс?**

– Омам наме Пелагея Николаевна Остерова, áги о́париш наме Алгадьева о́лыс. Алгадье́выт сасга-нум Ме́нkvя пáвылт ты о́лсыт. Ка́нканэ нýвrameыт пуссын Ху́люмсўнтыт о́лсыт. Рўтанум пуссын ваганум. Ху́нь омам ва́г-тал патыс, тара щивгу́нкв та патсыт. Ты э́лы-пáлт тáн минэгыт, омам тáра ат минэгыт. Тувыл тав матмыг ёмтыс. Тáн сасгум палт Ку́льпасн ёхтёгыт, ос ка́нканыл Шёман о́лыс, ты омам ма́нь áппитэ Шёман. Селивёрст Семёнович палт тув ёхтёгыт, а омам тáра ми́ныяныл. Матум э́ква таимáгыс та, тав пасан ху́нь вáри.

– **Дина Тимофеевна, áтян хóнтла́нкв ми́наме порат манах нýвrame юн ху́льтыс?**

– Áтям хóнтла́нкв вуим порат, омам лáви, онтолов нýвrame о́лсув. Ма́н ат хóтпа ху́льтсу́в – ка́нкум Пе́тр Тимофе́евич Остеров, ос хóнт-лын ма́т о́лыс, юв ат ёх-тыс. Яныг увщим Агафья Тимофеевна Остерова пýркатирыг о́лыс, яныг ку́щай нэ. Ойкари́щит тавёныл ху́рахласыт. Тувыл тав хум вáрыс, Тихон палт ми́нас. Ху́люмсўнтыт о́лыс. Тувыл Нина Тимофе́-

евна, тав ос Хозумовн хáйталавес, Хóры́нпá-вылт о́лыс. А́нь акв пы́ге туп ху́льтыс, Никола́й. Ос Улья́на увщим о́лыс.

Тав а́нь хўрум пы́ге ос тит áгия́ге ху́льтсыт. Áгия́ге-пы́гаге яныг ёмтсы́г, хотта́ль щалтсы́г. Ма́нь пы́ге Игóрь самы́н патум юи-пáлт Потра-су́йт хотта́ль щалтыс. Са́т нýвrame Улья́нам о́ньщиглас. А́нь акв áгитэ Татьяна Егóр Васи́льевич о́йкатэ ёт Ялу́торовск ўст о́лэг, о́париш наме Халидова.

Ма́нь áгири́ще Нина Урай́т о́лы. Тав а́нь Нина Васи́льевна Рос-товцева, тит нýвrame о́ньщи. Ва́щка Нындат о́лы, ўйхул пусмáлтан лё́ккарыг рўпиту́ты. Сака ё́мас лё́ккар кос, ос а́яла́нкв сака кáсащи. Сла́вка Ясунты́т о́лы, сáв тáл ат аи. Лешка о́с тот о́лы. Ат те айну́в, сака ё́мас о́лыс. Ху́льтум нýвrameанэ ты.

– **На́н áгия́гын хóт о́лэг?**

– Ам áгия́гум - юрты́н нýвrameыг. Акв áгим Инна Алекса́ндровна Деркач Бело́ярский ўст о́лы. Тэ́рпит тына́лан колт фарма́цевтыг ман про-визорыг рўпиту́ты. Тувыл мóт áгим Анже́ла Алек-сандровна Я́грим пáвыл шко́лат рўпиту́ты.

– **Ще́мья́ныг ёмтсыг?**

Манах нýвrame о́ньщёг?

– Ще́мья́ныг ёмтсы́г. Анже́ла акв пы́г о́ньщи. Тав Каза́нь ўст универ-ситеты́т хани́щтахты. Мóт áгим Инна́м титыг о́ньщи, áгитэ о́с Каза́нь хани́щтахты, пы́ге тыт Ўст о́лы.

Дина Тимофеевна шко́ла áстламе юи-пáлт Ленинград ўст нýвrameыт хани́щтан хóтпаг хани́щ-тахтас. Тот ты Алекса́ндр Яковле́вич Лисов о́йкатэ ёт акван-хóнтхатсы́г, акван-минасы́г.

Тит тáл ю́вле ху́льтум порат тэ́н ялпы́н хóтал вáрыгласы́г. О́йкатэ́нтыл сáв тáл аквё́т о́лнэтэ́н ма́гыс мўйлысы́т. Тэ́н Ленинград ўст ййквнэ колт акван-хóнтхатасы́г, та пáсныл аквё́т ты о́лэг. А́нь ты хóтал мус аквё́т хўл алы́щлым, пум вáрим яласэ́г.

Ма́н, ма́ньщи газетат рў́питан ма́хум, Дина Тимофеевна́н сáв ё́мас ла́тын лáвёв – ма́тьёмас ма́н халувт яныг мў́тра э́лалы́ тотнэ тамле нэ хóтпа о́лы, ма́н ми́рув пёс накы́т, пёс вáрмáлит яны́тлыанэ, мóт ма́хум ху́лтыанэ. Ля́па рў́т ма́х-манэ пуссын пу́стагы́л вос о́лэгыт. Най-О́ты-раны́лн вос ўргала́вет.

**Валентина
ХОЗУМОВА**

Мāньщи эргыт эргуҥкве сака хāсэг

Дарья Петровна Шмелёва, такви дōпарищ наме Сайнахова, Хāльўс район Ягрим пāвылт колтāглэ эт олы. Такви Сўкырья пāвылт яныгмас. Омаге-āтяге мāньщи хōтпаг олсыг. Дарья Петровна такви щёмьятэ урыл тох потыртас:

– А́ям Пётр Андре-евич ос омам Елена Гавриловна Сайнаховыг Сўкырья пāвылт олсыг. А́ям 1917 тāлт ойттур этпос 12 хōталт самын патыс. 1942 тāлт Ленинградский фронтын хōнтлаҥкве тотвес. 1943 тāлт вōртур этпос 18 хōталт сакватавес. Пўльницат хоса пусмалтавес, тувыл элаль хōнтлаҥкве кетвес. Юв 1945 тāлт ущ эхтыс. «За боевые заслуги» мāглын тагатан пōс онышас.

Война юи-пāлт «Саранпаульский» намба совхозт вōраян ос хўл алышлын хумыг рўпитас. А́ям 1989 тāl мāньполь этпос 10 хōталт āтимыг емтыс. Тав урётыл «Птицы Светлой памяти» намба нēпакт хансым олы. Ты нēпак Саранпāвылт олнэ хōтпат тāратасыт. Тāн Саранпāвылныл ос та ляпат олнэ мāнь пāвлытныл хōнтлаҥкве ялум хōтпат урыл потырт тув акван-атсыт. Ам ты нēпакыл ос мўй-луптавёсум. Ты хōтпат таяныт эрнэ рўпата вāрсыт, ам тāнанылн яныг пўмащипа лāтың лāвёгум. Мāнавн хōнтлам ос тот порсум мāхманув ёрувляҥкв шар ат рови.

Омагум-āтягум сāt нāврам янмалтасыг. Мён ань Марина эшум эт мёнккемён хулыт-сумён. Мōт каҥканум, увшияnum пуссын āти-

мыг ёмтсыт. Марина эшум ос Ягрим пāвылт щёмьяҥ тāгыл олы.

Ам школа āстласум, Ханты-Мансийск ўсн минасум, тувыл пед-училищат туп акв тāl ханищтахтасум. Ёст олункве ат вёрмысум, ханищтахтын мāныл та пōйтсум. Ты юи-пāлт Ягрим пāвылн олункве ёхтысум. Пенсиян патхатнэ мус садикт нāврамыт ўргалым рўпитасум. Марианам школа āстламе юи-пāлт Салехард ўст ўйхул пусмалтан лēккарыг ханищтахтас. 1979 тāлт Ягрим пāвылн рўпитаҥкве ос ёхтыс, та пāс-ныл тыт олы.

Мāньнувег олмум порат эшум эт вāтихалнув Сўкырья пāвылн ялантасмён. Ань тай мёнки яныг хōтпаг ты ёмтымён, юв сака ат ялантāлымён. Саранпāвылт ос Сўкырьярт рўтанмён олэгыт. Омам рўтанэ Вьюткиныт ос тот олэгыт. Ам тāнаныл пуссын номияnum, пуссын янытлыяnum».

Дарья Петровна ойкатэнтыл 42 тāl аквёет олэг. Тэн кит нāврам янмалтасыг. Пыгён Игорь Ягрим пāвылт колтāглэ эт олы, акв пыг, акв āги оныщи. Экватэ ос мāньщи нэ, Восыңтўр пāвылныл олы. Дарья Петровна пыге пыг наме Илья, тав ты тāl 19 тālэ тōв-лыс, Ксения 13 тāl яныт āгиришкве.



М.П. Чашина ос Д.П. Шмелёва

А́гитэ Оксана Свердловский область Алапаевск пāвылт щёмьятэ эт олы. Акв āги янмалты, наме Станислава.

Дарья Петровна хосат тāгыл кос пенсият олы, тувыл тēла тāl шар ат ўнлы. Тэн эще эт эргуҥкве сака хāсэг. Мāньщи нэг туранэн сака суиңыг олэг. Кит ягāгийг «Вдохновение» намба ансамблит сāvсыр ялпың хōталыт порат мōт экват эт руш эргыт эргег. Мāньщи эргыт тэн ос эргег. Ты урыл Дарья Петровна лāвыс: «Мён Марианам эт мāньтāгыл аквёет эргимён. Каҥкув Сўкырья пāвылт кина суссылтым рўпитас. Тōнт кина сунсым мён сāvсыр эргыт тāра ханищтасанмён. Номилум, мāнь порат Марианам эт кол пōхат акваг тот тятятлахтасмён, акваг эргысамён.

Ань Ягримт мāнь-ащиянув хунь акван-атхатыглэгыт, тув ос акваг ялантымён. «Ўринэква хōталт», сосса мāхум янытлан

хōталн, округув янытлан хōталн ос вōвыгла-вемён. Тот мён мāньщи эргыт эргымён. Ам тōва руш эргыт мāньщи лātңыл толмашлыя-нум, ос тувыл эргияnum. Саран эргыт ос вāганмён, тōва ялпың хōталт тāнаныл ос эргиянмён. 2019 тāлт вōртур этпост Ягрим пāвылт касыл вāрыглавес, мāхум сāvсыр пāвылныл мāнь-хāпыл товункве ёхтала-сыт. Ялпың хōтал кит хōтал олыс. Мён ос тув эргуҥкве вōвыглавёс-мён».

Ты этпос сатыт хōталэт мāньщи мāхум «Ўринэква хōтал» янытласыт. Ам Дарья Петровна ос тав эще Марина Петровна ты ялпың хōталыл яныт-лыягум. Щёмьянэн пус-тāгыл элаль вос олэгыт. Тōрумн ос Отыранувн вос ўргалавет. Дарья Петровна ос Марина Петровна элаль аквта щирыл суиңыщ вос эргег ос мирн сāv щагт вос тотэг.

Людмила ТЕТКИНА

Налыман тал лёккарыг рупитас

Галина Васильевна Собянина, такви
ёпарищ наме Мултанова, ханты
нэ. Ты яныгпала ёква Большой Атлым
павылт олы. Ам тэлы порат тув ялсум,
тав ётэ хонтхатыгласум, такви рупататэ
ос олупсатэ урыл анумен потыртас.

Тав Сургут үст 1940
талт самын патыс. Хотал
нэглын ёрт олнэ ханты
мэхум латһыл потырты.
Атхуйплов талэ төвлын
мус тот олыс. Тувыл
1955 талт школат сат
класс асталас ос элалы
Ханты-Мансийск үс
медучилищан лёккарыг
ханищтахтуңке минас.
Тот нила тал ханищ-
тахтас.

Хунь акв тал ха-
нищтахтас, тувыл
хопсы агмыл ёмтыс. Та
порат ань ёмас маснут
атим олыс. Вовта пальту-
выл ащирмаң хоталыт
кон ёмыгтыматэ полъ-
тахтас. Түяг агмыңыг
ёмтыс, вортур ётпост
ушта пусмалтахтас, пүль-
нищаныл кон-тартвес.
Сүкыр ётпост ос ювле
оыыл курсын ханищтах-
туңке минас.

1959 талт ханищ-
тахтын маңыл астыс,
ойттур ётпост тара
Ханты-Мансийск үс
хопсы агм пусмалтан
пүльнищан рупитаңке
вуйвес. Тонт сав махум
хопсы агмыл ёмталасыт,
пүльница таглыңыг
олыс. Лёккарыт акв
ётэ-хоталэ рупитасыт,
акв хотал ушлахтасыт

ос элалы рупитаңке та
минасыт.

Тувыл тав хум варыс.
Ойкатэ Октябрьский
район Большой Атлым
павылныл олы, ханты
хум. Маньлат нэ тув та
тотвес. Тот ныврамыт
самын патнэ лёккар
колт рупитаңке патыс.
Та порат павлың нэт
танки пүльнищанылт
нывраманыл самын пат-
тысаныл, тот матыр-ати
эрнэ ут пуссын олыс.

Пёс порат павылт са-
выңпалэ ханты махум
олсыт. Яныгпала хотпат
рущ латһыл потыртаң-
ке шар ат хассыт, туп
маньлат махум мощ
потыртасыт, тувыл та.
Касың ханты щёмыя
10-12 ныврам ошсыт.

Галина Васильевна
ат тал тот рупитас.
Тувыл Сотниково па-
вылын рупитаңке кётвес.
Тот матахмат тал рупи-
тас.

1976 талт Большой
Атлым павылын ювле ёх-
тыс ос павыл пүльница
күщаиг паттувес. 1999
тал мус рупитас ос
пенсиян минас. Тот иң
кос рупитанув, ос па-
вылт тарвитыңыщ олнэ
нэ хотпат яныг павыл



пүльнищан кётуңке
патвёсыт.

Эква лавыс: «Ман
сартын тарви-
тыңыщ олнэ нэт сака
ёмщакв уральтасанүв,
нэматыр ищхипың ут
ат эрыс. Хунь нэ хоталэ
ёхты, та порат нывраме
самын та патыс. Молал
агим агитэ тарвитыңыщ
олыс. Павылт хус хоталн
сартыннув илямтавес.
Октябрьский павыл
пүльнищан свонитасум,
вертолёт вёвсум. Тан
лавсыт, вертолёт атим.

Тувыл маныр ва-
руңкв. Мань пёс пүль-
нищан нывраме самын
та патыс. Маныр эри,
амки варсум. Та юи-
палт вертолёт ёхтыс,
агим агитэ ушты самын
патум ныврамың тагыл
Андра павыл пүльнищан
тотвес, хасвес, эрттам,
тав тот нывраме самын
патыс».

Манрыг ёква ныврам
павылт пирмайтастэ,
тымагыс Октябрьский
пүльница күщай хум
сака лявтыс. Овлёт
Галина Васильевна

тавён ювле нэматыр ат
лавыс. Тувыл ты тэла
турён ёхтыс, ювле тав
нупылэ ос лявтуңке
патыс. Ты юи-палт мощ
рупитас ос пөхын та
минас.

Тав пүльнищан пус-
сын аквёет налы-
ман тал рупитас. Павлың
мирн ань тыг мус сака
эруптаве ос янытлаве.
Тён ойкатэнтыл нила
ныврам янмалтасыг:
хурум аги, акв пыг. Ань
нывраманён лов ныврам
оңыщёгыт: ат пыг, ат
аги. Тан ань ос нёло-
лов ныврам янмалтёгыт.
Павлың мир матыр аг-
мыл ёмтёгыт ке, тав
палтэ уральтахтуңке
ёхталёгыт. Төва хотпат
телефон хосыт свонитэ-
гыт, пусмалтахтын урыл
китыглахтёгыт. Ёква
касың хотпан нёты.

Тамле ёмас хотпа ёт
мань павлың мат ам та
хонтхатыгласум. Сав тал
пустагыл ос сөтыңыщ,
щуниңыщ элалы вос олы.



**Николай
МЕРОВ**

ПОБЕДА!
1945
2020
Поздравляем
с праздником
Великой
Победы!

Хохаң павылныл олум хотпа



Мария Павловна Монина 1929 талт
лүпта этпос овыл хоталт Хальүс
район Хохаң павылт самын патыс. Яныг
хонт овылтахтам порат иң мӑнь нӑврамыг
Чапаев нампӑ колхозт рупитаңкве патыс.

Мот махум ӗт хӑл алышлас, колхоз магсыл пум вӑрыс, нӑйив атыс. Тӑрвитың рупата вӑруңкве шар ат пилыс. Война юи-пӑлт ӗлӑль колхозт рупитас.

1958 тӑл пӑсныл ӧйкатӗнтыл аквӗт «Саранпаульский» нампӑ совхозт сӑлыңколт рупитасыг. 1972 тӑлт колтӑглӑ ӗт Хохаң павыл ляпаннун вӑнтлысыг. Ӗйкатӗнтыл аквӗт вӑраян хотпаг коопзверопромхозт рупитасыг. 1979 тӑлт пенсия тӑланӑ ӗхтысыт, ты юи-пӑлт иң лов тӑл рупитас – вӑраяс, хӑл алышлас.

Сӑв тӑл кӑркамыг рӯ-

питама магсыл сӑвсыр янытлан нӑпакыл, грамотал, магылн тагатан пӑсыл майлуves. Тав «50 лет Победы в Великой Отечественной войне 1941-1945 годов», «За доблестный труд. В ознаменование 100 - летия В.И. Ленина», «Медаль материнства» магылн тагатан пӑсыт ос «Ветеран труда» нам ӧнысас. Мария Павловна 2003 тӑлт яныгпӧль ӗтпост ӑтимыг ӗмтыс, Сортыңӑ павылт ӗл-щӗпитавес.

Потыр Кульпас
павылт 3 классыг
хаништахтын пыг
Никита ЧИРКОВ
хансыс

Тав хонтлаңкве тотыглавес

Мӑн щӗмьявт войнат хонтлам хотпа ӧс ӧлыс, тьи щӑщӑквӑм тав ӑтӑтӑ - Николай Андреевич Филиппов. Тав яныг хонтлан нак олум порат хонтлаңкве вуйвес.

Николай Андреевич 1910 тӑлт вӑт сӑграпнал ӗтпос 19 хотӑлӗт самын патыс. Хонтлаңкве 1941 тӑлт тотвес, тӧнт тавӗн налыман нупыл акв тӑл тӧвлыс. Артиллерийский полкыт хонтлыс, яныг пушкал пӑтлуптас. Тот сакватавес, тувыл госпиталь-колт хоса пусмалтавес. Пусмалтахтаме юи-пӑлт ӗлӑль хонтлаңкве минос.

Война юи-пӑлт Викулово пӑвылн ӧлмыгтас, тот щӗмьяңыг ӗмтыс. 1946 тӑлт колтӑглӑ ӗт Кульпас пӑвылн

вӑнтлыс. Ӗкватӑ ӗт хот нӑврам янмалтасыг, ань акв пыгӗн Микол туп ӧлы. Яныг ӧпам лӧльсаң хӑлыс ос сувың тӑгыл ӗмыгтас.

Яныг хонтлан нак урыл тав шар ат потырталыс. Тӧва порат махум китыглахтасыт, хумус войнат хонтлас, тав ювле акваг лӑвыглас: «Маныр магыс китыглахтӑгын?»

Яныг ӧпам 1972 тӑлт ӑңк нӑтнӑ ӗтпос 21 хотӑлт ӑтимыг ӗмтыс. Кульпас пӑвылт ӗл-щӗпитавес. Мӑн пуссын таве номилӧв, тавӑтыл янытлахтӑв!

Потыр Кульпас
павылт 3 классыг
хаништахтын ӑги
Диана ХОЗУМОВА
хансыс

Вӧр ӧргалан хотал

Мӑньпӧль ӗтпос 21
хотӑлт мӑ яныгыл вӧр
ӧргалан мирхал хотал
вӑрыглаве. 1971 тӑлт
Генеральный Ассамблея
ООН ӗрнӑ нӑпак пирмай-
тас ос ты хотал янытлаң-
кве патвес.

«Берёзовский» нампӑ заказник рупитан хумыг А.В. Табун ос В.Г. Пигуль ос мирн нӗтнӑ организацият рупитан нӑ Н.Н. Данилова вӧр ӧргалан хотӑлт нӑврамыт ӗт потырталыс.

Н.Н. Данилова нӑврамытын «Рассказы о русском лесе» нампӑ нӑпак урыл потырталыс. Ты нӑпак В.И. Морозов хансыс, тав сӑв тӑл вӧр ӧргалан хотпаг рупитас. Владимир Морозов мӑ-вит урыл сӑв ӗмас потрыт, стихыт хансыс.

А.В. Табун ос В.Г. Пигуль «Берёзовский» нампӑ заказник рупа-

татӑ урыл потырталыс. Агиришит-пыгришитн та мӑт пӧслум хурит суссылтасыг. Хоты ййвыт тот яныгмӗгыг, ййвыт тӑн хумус ловиньтыяныл, нӑпакн хумус хансыяныл, та урыл лӑтың лӑвсыг. Нӑврамыт ты вӑрмалы урыл сака пӧмшалахта-сыт, тӑн вӑрнӑ рупататӑн урыл сака хоса китыглахтасыт.

Хумыг лӑвсыг, тӑйт толункве ты ӧвылтахтас, мощӑртын мӑлтып, рӑгың хоталыт ты ӗмтӑгыт. Тӧнт сӑв махум вӧрн ялантаңкве патӑгыт. Тӧват ӑраш хот ат харыгтыяныл, кӑсың тӑл сӑв вӧр улян тӑве. Агиришит ос пыгришит вӧрүв ӧргалаңкве лӑввӑсыт.

С.В. Венчиков потре
мӑньши лӑтнӑыл
Людмила ТЕТКИНА
хансыстӑ

Туи порат павыл суиңыг ёмты



Екатерина Семёновна Лазарева Белоярский район Касум павылт самын патыс. Тот яныгмас ос школа асталас. Тувыл манылат ағииг өлмёт Большой Атлым павылын ялыс, тот ойкатэнтыл акван-хонтхатсыг. Ань нэ такви өлүпсатэ урыл потыртас.

Такви ағи өпариш наме Спиридонова ылыс. Пес порат аще Ас ят хул алышлым рупитас. Тонт супыг, мохсаң, үсхул, кайрай хул сав ылыс. Ты атың ос тының хулкве сав пувыгласыт. Шапак, сымри, касэв, сорт хул ос алышласыт. Касың павыл ос үс ляпат хулыт пирмайтан плашкоутыг үнлысыт. Махум пувум хуланыл тув майлысаныл.

Тав омадэ Елена Николаевна, такви өпариш наме Тарлина, ос Касум павыл нэ. Тан йис мананылт ос хул алышлым, вораим, пил ватым, лахыс атым яласасыт. Тувыл павылт сёмыл охсарыт янмалтан перма ылыс. Нэ тот ос рупитас.

Екатерина Семёновна атытэ каңке Большой Атлым павылт ылыс. Аквматнакт манылат порат ағи акитэ палт

муйлуңкве минос. Та павылт мощ ылыс, хум ёт вайхатуңкве патыс. Мощ эруптахтасыг ос акван та миносыг, тох ты ағи павылт хулытыс. Ань тыг мус тот ылы.

Сартын павыл культура колт сосса няврамыт

эргын ос йиквнэ ёнгын кол ылыс. Екатерина ос тув ялантас. Ялпың хоталыт ылыглан порат, тот мот ағит-пыгыт ёт эргыт эргыс ос йиквыт йиквыс. Та порат павылт пёс йис ылыглан хулна накыт ванэ сав яныгпала хотпа ылыс. Тан ты манылат хотпат пёс йис вормальн ханищтасаныл.

Ань та яныгпала хотпат пуссын атимыг ёмтсыт, акв эква Анна Дмитриевна хулытыс. Тав манылат махум мощ хултыгылыанэ. Пурлахтын порат махум тавэ вовиньтыяныл. Эква хаснэ щирыл матыраты вэри.

Павылт пуссын аквёет хурумсаткем ёлумхолас хулытыс. Тыгыл нёлсат ханты хотпат, мотаныт пуссын рушит. Савыңпалэ пенсия винэ махум ылыгыт.

Агит-пыгыт школа асталанёныл юи-палт элалэ ханищтахтуңкве минёгыт. Тувыл хоты үст манос павылт рупата хонтёгыт, та мат ылуңкве та хулытёгыт. Юв туи порат ушлахтуңкве ёхталёгыт.



Большой Атлым павыл торыг я овты, тот яныгпала хотпат хулупёгыт. Тэлы порат ос вит вонха вэрегыт, тэнэ магыс нясыл хул пувёгыт. Ампапыл, катияныл тыттын магыс ос товылхаты. Ты коньпал тэпкант картопка ос мот тэнут янмалтёгыт, тох та манэ павылт лашал ылантёгыт. Танки макёныл урыл тох лавёгыт: «Ты мат нявраманув янмалтасанув, манки ылыс, тыгыл нэмхотталь воссыг ат минёв».

Павыл клуб-колт ялпың хоталыт пуссын вэрыглавет. Тот ағит-пыгыт концерт суссылтёгыт. Катыл савсыг пормасыг вэрегыт, тучаңыт, аканит ёнтёгыт, сакныл турлопсыт, пальсакыт хартёгыт ос мот пормас вэрегыт.

Молал павылт интернет вэревес. Ань няврамыт мёрсың порат кон хайтыгтёгыт. Юн ищхипың ут хосыт савсыг пумащ кинат сунсёгыт. Туи порат павланыл аквтупмат сайкалы, суиңыг ёмты. Та порат савсыг маныл манылат махум нявраманыл ёт ушлахтуңкве ёхтёгыт. Тан кон мечикыл ёнгёгыт ос нас тыгле-тувле хайтыгтёгыт, сака ёмасыг ёмты.

Екатерина Семёновна кит няврам ыныщи. Яныг ағитэ Ханты-Мансийск үст лёккарыг ханищтахтас. Ань тот манэ няврамыт самын патнэ пүльницат рупиты. Пыге ағмың-мосың хотпа, тав павылт омадэ ёт ылы. Ань нэ пенсиян патыс, савыңпалэ нявраманэ няврамыт үргалым юн үнлы.

**Николай
МЕРОВ**

Няврамыт эргим потыртаңкве ханищтыянэ

Ань хӧт-ати сӑвсыр колыт рӱпитӑгыт. Тӑн сӑвсыр ширыл мирн нӛтӑйит. Акв тамле кол урыл потыртаңкв таңхӛюм. Ты кол Ханты-Мансийск ӱст ӧлы.

Тот Игорь Сиренко такви янас студия-кол ӧныщи, студиятӑ наме «Центр музыкального развития SIRENCO». Тот тав ӑлумхӧласыт ӑрыӧнкв, руц сӑнквыл-тапыл ӛньюнкв ханищтыянэ ос мӧт осӑвӑтал ӛнӑин вӑрмалӑн. Ӕрыит ӧс ӛл-хансыянэ.

Та коныпал тӧва щӛмьят нявраманыл потыртаңкв ат хӑсӑйит. Тӑн тав палтылэ тотӑяныл, тав та няврамыт ӑрым потыртаңкв ханищтыянэ.

Няврамыт ӛт тав потыртаңкв хӑсы, студият ӛмашакв ӧныщиянэ, сома такви нявраманэ ӛт потырты. Тӑн тав



И. Сиренко

палтылэ ханьщувлым ӧлӑйит, ат ӛссамтӑйит.

Яный ӑлумхӧласыт ӛт тав ос мощ мӧт ширыл рӱпиты, аквта вӑрмалӑ вӑрункв ханищтыянэ. Ам амки тув ӧс ялантӑюм ӑрӑяnum ӛл-хансуӧкв. Тав ӑнумна тӧв порат ӧс лӑви, хумыс хансуӧкв ӑри, хумыс ӑти. Ам таве хӱнтлылум, вӑйлум, тав мӑщтыр ӧйка, осӑвӑтал ширыл хӑсы.

Такви сака ӛмас ном-тыӧ ӑлумхӧлас, вӑйтӑ,



Мӑхманэ ӛт ӑрги

маныр вӑри. Хосат тӑйл мӑхум ӛт рӱпиты, маныр такви вӑрункв хӑсы, ханищтыянэ. Такви янас группа ӧныщи, тӑн сӑвсыр ӑрыит ӑрыӛгыт. Ты мӑхманэ ӛт яласы, мӧт-мӧт мӑт ӑрыит ӑрыи.

Ам тав ӛтӑ лӱпта ӛтпос порат кӑсалахтасум, хунь ам Ханты-Мансийск ӱсн вӧввӛсум ӧвыл ӑрым ӑрыӧнкв. Тав ам ӑрым ӛл-хансытӑ. Ӕтыл ӑнумн лӑвыс, ӑртум кос хунь тав палтылэ вос хӑсянум,

олн ат ӑри. Ань ам хаснэ ӑрӑяnum пуссын тав палтылэ ӛл-хансыянум.

Сӑртын тав ам палтылум олн вуйлас, ӛтыл хунь ӛмашакв румалах-тасмӛн, воссыг виӧкв ат патыс. Ань ос мӛн аквӑӛт рӱпитымӛн. Ам номсӑюм, кос хунь тав палтылэ хӑсянум ӑрӑяnum. Тав ӑнум ӛмашакв торӑям-тытӑ, тувл аквта порат ос ханищтытӑ.

Евгений АНЯМОВ

Ам ловиньтӑгум мӑныщи лӑтӧыл рӛп

Ам хосат тӑйл алам,
Мӑныщи пыгрищ ӧсум,
Намум ам Bizzo Freestyle.
Вӑйлын ӑнум пуссын,
Ам мӑныщи пыйрищ ӧсум.
Ловиньтаңкв ам ӱсын
Ӕхтысум кос ос алам.

Мӑныщи лӑтӧыл потыртаңкв,
Ам ӛмшакв алам вӛрмӛюм.
Ловиньтӑюм рӛп,
Та халыт ӑрыг алам ӑргӛюм.

Ханьщувласум ӛмашакв
Лӑтӧыт акван-атуӧкв,
Вӑйлум, хоты лӑтын
Хоталь ӑри натуӧкв.
Кӑсыӧ лӑтын сымум консы,
Кӑтум хансы, пуӧкум номсы,
Ӕртӑлӑюм сӑвсыр лӑтын,
Ӕтыл ӑрый понсы.

Ам намум Bizzo,
Мӑныщи рӛпер ӧсум,

Хассум матах ӑрый алам
Хансырищум ӧс алам,
Яный вӑрмалӑ ӑти.

Ӕнум ӑрый хансуӧкв,
Кос манкем вос вӑти тав,
Щӛровн ӑри хансуӧкв.
Пӛс ам сака тӑкищ,
Тахсум ловиньтаңкв.

Номсасум та порат
Нӑн патӑйин мувиньтаңкв.
Ань ос ӑнум акв хурип,
Кос маныр вос лӑвейин,
Нӛмат хуньт ам рӛпум нӑн
Щама алам ат алӑйин.

Ам ловиньтасум, ловиньтӑюм,
Ловиньтаңкв патӑюм тах.
Осӑвӑтал сӑвсыр ӑрый
ам тах ӑргӛюм,
Ам номсӑюм, сӧтыракем
Хансуӧкв ӑрый вӛрмӛюм.

Тыил ӛлалӑ мӑныщит
Пуссын патавет ханьщуӧкв,
Тӑнь ань тӑнки янас алам
Патыт рӛпер ӧныщуӧкв.

Нӛмат хотӑют, нӛмат хуньт,
Нӛмат хӧт ат хунтамлӑлас,
Хумыс мӑныщи
мӑныщи лӑтӧыл
Рӛп хуньт ловиньтӑлас.
Ам тах ань ос мӑ янытыл
Тотыгпӛюм потыр,
Ӕрттум рӛпум ам алам,
Ӑныщи мӑныщи Ӑтыр.

Ам намум Bizzo,
Ловиньтаңкв та пӧйтсум,
Ӕрым ӧлыс вӑти кос,
Щӛровн матыр мӧйтсум,
Хунтлӛн ӑрый мӧтан,
Ос мощ ӑрый ӧлы,
Хӧнтийпейин кос хӧт нӑн.

Евгений АНЯМОВ

МОТ МИРЫТ ӨЛУПСА

Ярмум тэлат акван-нётхатым мұсхалыг щёпитыянув



Бурятия маңыл эвенк хум Руслан Вачеланов Ханты-Мансийск үсн ёхталас. Ты хум такви щань латңе ёмщакв вагтэ. Тав өлнэ матэт ань университетыг мот хон латңытыл потыртаңкве ханищтахты. Щань латың ханищтап хумус олы, тав ты урыл мощ потыртас.

Ань хум Бурятия мат мирколт рупиты. Ты коньпал сосса мир пёс йис олупса ханищты. Такви мире өлнэ-хүлнэ накыт ос ат ёрувляынэ, акваг элаль тотыянэ. Ялпың хоталыт порат

эргуңкве ос ййквуңкве вөвиньталаве. Ты вәр-малын маңьтагыл щань-нягөн-ащакгөн ханищта-вас.

Мә янытыл эвенк махум пуссын аквёет нелсат сотыра хультыс.

Тан салы үрим, вөраим ос щаршит хул алыщ-лым өлэгыт. 2010 талт Россия мат налыман ну-пыл ат арыгтем сотыра эвенк хотпа олы. Китай мат 2010 талт эвенкыт ос орчоныт рұтыг өлнэ махум пуссын акван-ловиньтавёсыт. Тох ёмтыс, тот ань налыман савиткем сотыра элум-холас хультыс. Тыгыл китсаткем хотпа салы үрим өлэгыт.

Монголия мат ос эвенкыт хосатнув 1992 талт ловиньтавёсыт. Тот ань акв сотыра савиткем элумхолас олы. Ос савыңпалэ ты махум танки латңыл ат потыр-тэгыт. Эвенк маңьши щирыл толмашлаңкве ке, «урамың ворт өлнэ махум» - тох лававет.

Руслан лавме щирыл, Бурятия мат това маңь павыл школатт щань латңыл няврамыт мощ ханищтавет кос, ос савыңпалэ маңьлат хот-

пат танки латңаныл ат ваганыл. Тот тамле вәрмалы ос олы, няврам ханищтан хотпа атим. Тувыл университетыг тамле учитель ос ат ханищтаве. Касың мат щань латың элаль тотнэ щирыл аквхурип тар-витыт өлэгыт. Ты вәр-малит акван-нётхатым мусхал щирыл щёпитаңкве эрөгыт.

Хум тыг ёхталаме порат, ам таве маң өлнэ мав урыл мощ потыртаңкве вөвыслум, тав тох лавыс: «Тыт ам сав ёмас хотпа ёт вайхатуңкве патсум. Ханты ос маңьши махум мощцаг хультыс кос, ос тан щань латңаныл элаль тотнэ магыс акван-нётхатым рупитэгыт. Танки пёс йис олупсаныл ос ат ёрувляыныл, акваг элаль тотыяныл, тыи аномн сака мұсты». Тох ты эвенк хум маң мав мощ янытластэ.

Николай НИКИТИН

Юн олым пёс пормасыг сунсыглэн

Ты йист ма янытыл савсыр матт өлнэ мирыт тарвитың хащтал агмыл ёмтуңкве патсыт. Това махум лёккарытн пусмалтавет, товат ос тох аты вөрмавет.

Ань Россият өлнэ мир, хотыют рупиты, тан юн олым рупитаңкве кет-вёсыт. Ты агм лакква ул вос минос, махум юн үнлуңкве лаввёсыт, туп мак эрнэ вәрмалы магыс кон-кваллуңкве рөви.

Пормас, маснут тына-лан яныг лапкат, тэпья-лан, ййквнэ колыт ос мот сав акван-атхатыг-лан колыт пуссын лап-пантвёсыт, туп тәнүт лапкат палыг-өлэгыт, рупитэгыт. Махманувн

юн үнлуңкве марщу-мыг ул вос патыс, тан магсыланыл ёмас вәр-малы щёпитавет.

«Югра» телерадиоком-пания ты урыл потыр-тас. Ань касың павылт, үст интернет олы. Ты ут хосыт нан юн олыман «Мә-вит ос элумхолас» наппа музей-колт өщнэ ханты ос маңьши пёс йис пормасыг кәсалаңкве вөрмегын. Ты тэла магыс «Артефакт» наппа приложение нанки теле-

фонинт вәрелын. Та ут тара нан мот матт рупитан савсыр музейт сунэ магыс ос щалт-суңкве вөрмегын тах. Тот пёс йис пормасыг урыл потырт хунтлуңкве рөви.

«Төрүм Маа» музейт рупитан хотпат ань ос тамле вәрмалы щёпита-сыт. Тот махум ос ищ-хыпың ут хосыт пёс йис пормасыг сунсуңкве вөр-мегыт.

Ты тэла өвлэт Россия Министерство культура магыс щёпиталвес. Сар-тын ты пёс йис порма-сыг урыл потыр туп музейт рупитан хотпат васыт. Ань касың хотпа

пёс пормасыг урыл потырт хунтлуңкве ос интернет хосыт тана-ныл сунсылаңкве вөрми.

Ты коньпал кис-хатнэ хотпат танки те-лефонаныл хосыт пёс пормасыг пөслынэныл порат, тот тара ты пор-мас урыл потыр нэглы. Музейт рупитан махум лавсыт, хотыют ты йиль-пи номт щирыл нётмил вәруңкве кәсаши ке, ос ётыл вос ёхталы.

«Югра» наппа телерадиокомпания кетум потыр маңьши латңыг Николай МЕРОВ толмашластэ.

ХАНИЩАП

Ты нэ օвыл места вис

Ювле хультум
Этпост Пыть-
Ях օст нѳврам
ханищтан хօтпат
мѳгсыл касыл
вѳрыглавес, тув
сѳв пѳлыл округувт
рօпитан мѳхум
ѳхталасыт. Тананыл
янытлаңкве округ
кօщай нѳ Наталья
Комарова ѳхталас.

«Педагог года»
нампка касыл 25 тѳл сыс
вѳрыглаве, нѳврамыт
щар ѳмщакв ханищтан
хօтпат ты касылт нօх-
патѳгыт. Ты тѳл 81 хօтпа
касункве ѳхталасыт.

Яныг кօщай нѳ лѳвыс:
«Анѳ ищхипың ут хосыт
сѳвсыр рօпата вѳраве,
сѳв хօтпа кօстыр օс
ѳрнѳ вѳрмалѳ вѳруңкве
номылматѳгыт. Ам ном-
сѳгум, нѳн օс нѳврамыт
тох ханищтаңкве паты-
яның, халынт йильпи
вѳрмалил пѳнтхатѳгын».



Ищхипың маньл-вим-хури

Наталья Комарова
нѳврамыт ханищтан
хօтпатын лѳвыс, ты
накт акв хаштѳл ѳгмыл
ѳргалахтым нѳврамыт
юн օлым ханищтахтѳ-
гыт, интернет хосыт
ѳгирищит-пыгрищит ѳт
потыртаңкве օс рօви,
тѳнаныл тох вос ханищ-
тияныл. Маныр ат тор-

гамтѳгыт, учителянылн
вос хансѳгыт, акван-нѳт-
хатым тох ѳлалѳ номт
тинсуңкве ѳри.

Касум мѳхум халт
ман маньщи нѳквенув
օс օлсыт. Тан тѳнти
вѳрум уроканыл тот
суссылтасыт. Ты тѳл
«Учитель родного языка
и литературы» нампка

номинацият Раиса
Гаврильчик (Анямова)
нօх-патыс, тав «Лылың
сօюм» нѳврамыт колт
рօпиты.

Титыт местал Татьяна
Сайнакова майвес, тав
Сургутский район Рус-
скинская пѳвил школат
нѳврамыт ханты лѳт-
ңыл ханищты. օс хօр-
мит местал маньщи
нѳ Лариса Карпенко
(Хозумова) майвес, тав
Октябрьский район
Лѳи Нѳрихумит пѳвил
школат рօпиты, нѳвра-
мыт маньщи лѳтңыл
потыртаңкве ханищ-
тиянѳ.

Мѳн тан мѳгсыланыл
щѳгтым օлѳв, пуссын
янытлыанув, ѳлалѳ օс
вос сымыңыщ рօпитѳ-
гыт, нѳврамыт щѳнѳ
лѳтңаныл ханищтаңкве
вос кѳсѳщѳгыт.

**Лѳххал маньщи
лѳтңыл Галина
КОНДИНА
хансыстѳ**



Д.В. Герасимова хуригѳ

Лѳимѳ сѳрипօс

(Северная зѳря)
№7 (1217), 09.04.2020
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, гл. редактор –
Кондина Г.Р.
Телефон (3467) 33-22-72

Заместитель гл. редактора –
Кондина Г.Р.
Телефон (3467) 33-22-72

Ответственный секретарѳ –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399

Тираж 1710 экз.
Заказ 1387
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.